

**2012 թվականի հունվար-նոյեմբեր ամիսներին ՀՀ պետական բյուջեի
կատարման ամփոփ բնութագիրը¹**

2012 թվականի հունվար-նոյեմբեր ամիսներին ՀՀ պետական բյուջեի եկամուտները կազմել են 841 մլրդ դրամ, իսկ ծախսերը՝ 831.6 մլրդ դրամ, որոնք համապատասխանաբար 90.2%-ով և 85.1%-ով ապահովել են ՀՀ կառավարության տարեկան ծրագրի կատարումը: Հարկ է նշել, որ չնայած բյուջետային ծախսերի արձանագրված կատարողականին՝ ապահովվել է պետական բյուջեի ծախսային ծրագրերի շրջանակներում պետական մարմինների՝ սահմանված կարգով ստանձնած պարտավորությունների ամբողջական կատարումը: «Հայաստանի Հանրապետության 2012 թվականի պետական բյուջեի մասին» ՀՀ օրենքի 9-րդ հոդվածի 11-րդ կետի և 11-րդ հոդվածի 3-րդ կետի պահանջներից ելնելով՝ պետության դրամական միջոցների համախմբված հաշվառման նպատակով պետական բյուջեի ծրագրային և փաստացի ցուցանիշներում ներառվել են նաև ՀՀ պետական հիմնարկների համար բացված արտաբյուջետային հաշիվների համապատասխան շրջանառությունը, ինչպես նաև առանց սահմանափակման պետական բյուջեից կատարվող վճարումները: Մասնավորապես՝ արտաբյուջետային եկամուտները կազմել են շուրջ 22.7 մլրդ դրամ կամ նախատեսված տարեկան մուտքերի 95.8%-ը, իսկ ծախսերը՝ շուրջ 18 մլրդ դրամ կամ տարեկան ծրագրի 68.5%-ը: Առանց արտաբյուջետային միջոցների պետական բյուջեի եկամուտները կազմել են 818.3 մլրդ դրամ, իսկ ծախսերը՝ 813.6 մլրդ դրամ՝ ապահովելով տարեկան ծրագրի համապատասխանաբար 90.1% և 85.6% կատարողական:

ՀՀ պետական բյուջեի եկամուտները

Նախորդ տարվա նույն ժամանակահատվածի համեմատ պետական բյուջեի եկամուտներն աճել են 10.8%-ով կամ շուրջ 82.3 մլրդ դրամով, ինչը հիմնականում ապահովվել է հարկային եկամուտների աճի հաշվին:

Պետական բյուջեի եկամուտների 94.2%-ը ձևավորվել է հարկային եկամուտների, պետական տուրքերի և պարտադիր սոցիալական ապահովության վճարների, 5%-ը՝ այլ եկամուտների, 0.8%-ը՝ պաշտոնական դրամաշնորհների հաշվին:

¹ Պետական բյուջեի եկամուտներում, ծախսերում և պակասորդի ֆինանսավորման աղբյուրներում ներառված չեն արտաքին աղբյուրներից ֆինանսավորվող նպատակային ծրագրեր իրականացնող գրասենյակներով շրջանառվող միջոցները:

2012 թվականի հունվար-նոյեմբեր ամիսների ընթացքում ՀՀ պետական բյուջե են մուտքագրվել շուրջ 792.2 մլրդ դրամ հարկային եկամուտներ, պետական տուրքեր և պարտադիր սոցիալական ապահովության վճարներ, որոնք ապահովել են տարեկան ծրագրի 90.3% կատարողական: 2011 թվականի նույն ժամանակահատվածի համեմատ նշված եկամուտներն աճել են 11.8%-ով կամ 83.7 մլրդ դրամով, ինչը հիմնականում պայմանավորված է ավելացված արժեքի հարկի, շահութահարկի, բնապահպանական ու բնօգտագործման վճարների, եկամտահարկի, ակցիզային հարկի և մաքսատուրքի գծով ստացված մուտքերի աճով:

Հաշվետու ժամանակահատվածում պետական բյուջեի հարկային եկամուտներն ու տուրքերը կազմել են շուրջ 676.2 մլրդ դրամ, որի 49.8%-ն ապահովվել է ավելացված արժեքի հարկի հաշվին: Այն կազմել է 336.7 մլրդ դրամ և 12.6%-ով կամ 37.6 մլրդ դրամով գերազանցել նախորդ տարվա նույն ցուցանիշը: ԱԱՀ-ի մուտքերից 214.3 մլրդ դրամը ստացվել է ՀՀ սահմանին հարկումից, 122.4 մլրդ դրամը՝ ներքին շրջանառությունից: Հարկ է նշել, որ ԱԱՀ-ի մուտքերի աճն ապահովվել է և՛ ներմուծման, և՛ ներքին շրջանառության աճի հաշվին:

Պետական բյուջեի հարկային եկամուտների ու պետական տուրքերի 6.3%-ն ապահովվել է ակցիզային հարկի հաշվին՝ կազմելով շուրջ 42.8 մլրդ դրամ: Մասնավորապես՝ հանրապետություն ներմուծվող ենթաակցիզային ապրանքների հարկումից ստացվել է 28.8 մլրդ դրամ, հանրապետությունում արտադրվող ենթաակցիզային ապրանքների հարկումից՝ 14 մլրդ դրամ: Ընդ որում, տեղական արտադրության ենթաակցիզային ապրանքների հարկումից ստացված մուտքերը նախորդ տարվա նույն ժամանակահատվածի համեմատ ավելացել են 33.6%-ով, իսկ ներմուծվող ապրանքների գծով մուտքերը՝ 18.7%-ով. արդյունքում ակցիզային հարկի ընդհանուր մուտքերն աճել են 23.2%-ով կամ 8.1 մլրդ դրամով:

Հաշվետու ժամանակահատվածում ՀՀ պետական բյուջեի հարկային եկամուտների 15.6%-ը ձևավորվել է շահութահարկի հաշվին՝ կազմելով 105.8 մլրդ դրամ: Նախորդ տարվա նույն ժամանակահատվածի համեմատ շահութահարկի մուտքերն աճել են 16.3%-ով կամ 14.8 մլրդ դրամով:

2012 թվականի հունվար-նոյեմբեր ամիսների ընթացքում ՀՀ պետական բյուջե է մուտքագրվել շուրջ 82.4 մլրդ դրամ եկամտահարկ՝ ապահովելով հարկերի և տուրքերի 12.2%-ը և 12.6%-ով կամ 9.2 մլրդ դրամով գերազանցելով նախորդ տարվա նույն ցուցանիշը:

Մաքսատուրքի գծով մուտքերը կազմել են 40.1 մլրդ դրամ կամ հարկերի և տուրքերի 5.9%-ը և 21.3%-ով (7.1 մլրդ դրամով) գերազանցել 2011 թվականի համապատասխան ցուցանիշը:

2012 թվականի հունվար-նոյեմբեր ամիսներին պետական բյուջե են մուտքագրվել շուրջ 21.5 մլրդ դրամ պետական տուրքեր՝ ապահովելով տարեկան ծրագրի 101.3% կատարողական: Նախորդ տարվա նույն ժամանակահատվածի համեմատ նշված մուտքերն աճել են 5.5%-ով կամ 1.1 մլրդ դրամով:

Հաշվետու ժամանակահատվածում գործունեության առանձին տեսակներից գանձվել են շուրջ 14 մլրդ դրամ հաստատագրված վճարներ՝ ապահովելով հարկային եկամուտների ու պետական տուրքերի 2.1%-ը: Նշված մուտքերը նախորդ տարվա նույն ժամանակահատվածի համեմատ նվազել են 27.3%-ով (5.3 մլրդ դրամով)՝ պայմանավորված հաստատագրված վճարներով հարկվող գործունեության մի շարք տեսակներ հարկման ընդհանուր դաշտ անցնելու հանգամանքով:

2012 թվականի հունվար-նոյեմբեր ամիսներին ՀՀ պետական բյուջե են մուտքագրվել 22 մլրդ դրամ բնօգտագործման և բնապահպանական վճարներ՝ կազմելով հարկերի և տուրքերի 3.3%-ը: Նախորդ տարվա նույն ժամանակահատվածի համեմատ նշված եկամուտներն աճել են մոտ 2 անգամ (10.8 մլրդ դրամով)՝ հիմնականում պայմանավորված «Բնապահպանական և բնօգտագործման վճարների մասին» ՀՀ օրենքում, ինչպես նաև զուգահեռաբար «Ընդերքի մասին» ՀՀ օրենսգրքում կատարված փոփոխություններով, որոնց համաձայն հանքարդյունահանողների կողմից նախկինում պետական բյուջե վճարվող բոնուսի, կոնցեսիոն վճարի, ինչպես նաև մետաղական օգտակար հանածոների արդյունահանման համար վճարվող բնօգտագործման վճարների և ռոյալթիների փոխարեն սահմանվել են ռոյալթիներ՝ որպես բնօգտագործման վճարներ: Հաշվետու ժամանակահատվածում այս աղբյուրից ՀՀ պետական բյուջե է մուտքագրվել ավելի քան 12.2 մլրդ դրամ:

Հաշվետու ժամանակահատվածում ՀՀ պետական բյուջե են մուտքագրվել ավելի քան 10.9 մլրդ դրամի այլ հարկեր՝ կազմելով հարկերի և տուրքերի 1.6%-ը: Մասնավորապես՝

ավելի քան 5 մլրդ դրամ են կազմել արտոնագրային վճարները, 3.1 մլրդ դրամ՝ ճանապարհային վճարները, 329.6 մլն դրամ՝ կոնցեսիոն վճարը, շուրջ 411 մլն դրամ՝ հարկային օրենսդրության խախտման համար «Հարկերի մասին» ՀՀ օրենքով սահմանված տուգանքները, 387.1 մլն դրամ՝ հանրային ծառայությունների կարգավորման պարտադիր վճարները, 18.1 մլն դրամ՝ ռադիոհաճախականության օգտագործման թույլտվության տրամադրման (գործողության ժամկետի երկարաձգման) վճարները և 1.6 մլրդ դրամ՝ ՀՀ կառավարությանն առընթեր պետական եկամուտների կոմիտեի նյութական խրախուսման ֆոնդի եկամուտները: Նախորդ տարվա հունվար-նոյեմբեր ամիսների համեմատ այլ հարկերը նվազել են 24%-ով կամ 3.4 մլրդ դրամով՝ հիմնականում պայմանավորված վերոհիշյալ օրենսդրական փոփոխություններով, որոնց արդյունքում հանքարդյունահանողների կողմից նախկինում վճարվող և այլ հարկային եկամուտներում հաշվառվող բոնուսի, կոնցեսիոն վճարի և ռոյալթիների փոխարեն սահմանված ռոյալթիները հաշվառվում են որպես բնօգտագործման վճարներ:

Պարտադիր սոցիալական ապահովության վճարների գծով 2012 թվականի հունվար-նոյեմբեր ամիսների եկամուտները կազմել են շուրջ 116 մլրդ դրամ: 2011 թվականի նույն ժամանակահատվածի համեմատ նշված մուտքերի աճը կազմել է 3.3% կամ ավելի քան 3.7 մլրդ դրամ:

2012 թվականի հունվար-նոյեմբեր ամիսների ընթացքում դրամաշնորհային ծրագրերի շրջանակներում ՀՀ պետական բյուջե է մուտքագրվել շուրջ 6.4 մլրդ դրամ կամ տարեկան ծրագրով նախատեսվածի 44.1%-ը: Նշված գումարից 615.9 մլն դրամը ստացվել է ՀՀ տավարաբուծության զարգացման ծրագրի շրջանակներում, որն ուղղվել է տոհմային երինջների ձեռքբերմանը: 2.1 մլրդ դրամ է մուտքագրվել Հայ-գերմանական ֆինանսական համագործակցության «Հայաստանի գյուղատնտեսության ոլորտի աջակցության ծրագրի» շրջանակներում: Շուրջ 1.9 մլրդ դրամ է ստացվել Եվրոպական հարևանության շրջանակներում ՀՀ-ԵՄ գործողությունների ծրագրով նախատեսված միջոցառումների ֆինանսավորման համար ստացված դրամաշնորհի գծով: Շուրջ 1.8 մլրդ դրամ է մուտքագրվել պետական հիմնարկների արտաբյուջետային հաշիվներին՝ կազմելով տարեկան ծրագրով նախատեսվածի 75.8%-ը, առանց որի պաշտոնական դրամաշնորհների կատարողականը կազմում է 38%: 2011 թվականի նույն ժամանակահատվածի համեմատ ստացված դրամաշնորհները նվազել են 49%-ով կամ 6.1 մլրդ դրամով:

2012 թվականի հունվար-նոյեմբեր ամիսներին ՀՀ պետական բյուջեի այլ եկամուտները կազմել են 42.5 մլրդ դրամ՝ 104.2%-ով ապահովելով տարեկան ծրագրային ցուցանիշը: Նշված գումարից ավելի քան 19.3 մլրդ դրամը կազմել են ՀՀ պետական հիմնարկների արտաբյուջետային եկամուտները, որոնց ծրագիրը կատարվել է 97.7%-ով: Առանց արտաբյուջետային միջոցների այլ եկամուտների հունվար-նոյեմբերի փաստացի ցուցանիշի գծով արձանագրվել է տարեկան ծրագրի 110.2% կատարողական:

Այլ եկամուտների ծրագրի կատարողականը հիմնականում ապահովվել է բանկերում և այլ ֆինանսավարկային հաստատություններում բյուջեի ժամանակավոր ազատ միջոցների տեղաբաշխումից և դեպոզիտներից ստացվող տոկոսավճարների, իրավախախտումների համար կիրառվող պատժամիջոցներից և ՀՀ կառավարությանն առընթեր անշարժ գույքի կադաստրի պետական կոմիտեի ծախսերի նկատմամբ եկամուտների գերազանցումից մուտքերի հաշվին, որոնք համապատասխանաբար 400.2, 3 և 69.2 տոկոսով գերազանցել են տարեկան ծրագրային ցուցանիշները՝ կազմելով 4.4 մլրդ դրամ, 933 մլն դրամ և 297.8 մլն դրամ:

Պետական սեփականություն հանդիսացող գույքի վարձակալությունից եկամուտները կազմել են 736.8 մլն դրամ՝ կազմելով տարեկան ծրագրով կանխատեսված ցուցանիշի 100.2%-ը, իսկ պետության կողմից տրված վարկերի օգտագործման դիմաց հաշվետու ժամանակահատվածում պետական բյուջե է մուտքագրվել 4.7 մլրդ դրամ՝ կազմելով տարեկան ծրագրային ցուցանիշի 89.7%-ը և 18.1%-ով գերազանցելով 2011 թվականի նույն ժամանակահատվածի փաստացի ցուցանիշը:

Շուրջ 933 մլն դրամ է մուտքագրվել իրավաբանական անձանց կապիտալում կատարված ներդրումներից ստացվող շահաբաժինների գծով, որոնք 7.4%-ով գերազանցել են տարեկան ծրագիրը:

Տիրազուրկ, ժառանգության իրավունքով, ինչպես նաև ֆիզիկական և իրավաբանական անձանցից (բացառությամբ ՀՀ համայնքների, միջազգային կազմակերպությունների, օտարերկրյա պետությունների) նվիրատվության կարգով պետությանը որպես սեփականություն անցած դրամական միջոցներից պետական բյուջե է մուտքագրվել շուրջ 398.6 մլն դրամ՝ 15.6%-ով գերազանցելով տարեկան ծրագրային ցուցանիշը և 7.1 անգամ՝ նախորդ տարվա ցուցանիշը:

Օրենքով և այլ իրավական ակտերով սահմանված պետական բյուջե մուտքագրվող այլ եկամուտների գծով մուտքագրվել է ավելի քան 23.3 մլրդ դրամ՝ կազմելով տարեկան ծրագրով կանխատեսված ցուցանիշի 93%-ը՝ 10.6%-ով կամ 2.2 մլրդ դրամով գերազանցելով նախորդ տարվա նույն ժամանակահատվածի ցուցանիշը:

2011 թվականի նույն ժամանակահատվածի համեմատ այլ եկամուտներն աճել են 12.3%-ով կամ շուրջ 4.7 մլրդ դրամով, ինչը հիմնականում պայմանավորված է օրենքով և այլ իրավական ակտերով սահմանված պետական բյուջե մուտքագրվող այլ եկամուտների, իրավախախտումների համար կիրառվող պատժամիջոցներից մուտքերի և պետության կողմից տրված վարկերի օգտագործման դիմաց ստացված մուտքերի աճով:

ՀՀ պետական բյուջեի ծախսերը

2012 թվականի հունվար-նոյեմբեր ամիսներին ՀՀ պետական բյուջեի ծախսերը նախորդ տարվա նույն ժամանակահատվածի համեմատ աճել են 4.4%-ով կամ 34.8 մլրդ դրամով: Ընդ որում, աճ է արձանագրվել ընթացիկ ծախսերի գծով, իսկ ոչ ֆինանսական ակտիվների հետ գործառնությունների գծով գրանցվել է անկում:

Ընթացիկ ծախսերը հաշվետու ժամանակահատվածում կազմել են 763.7 մլրդ դրամ՝ 86.6%-ով ապահովելով տարեկան ծրագրի կատարումը: Նախորդ տարվա նույն ժամանակահատվածի համեմատ ընթացիկ ծախսերն աճել են 8.2%-ով կամ 57.6 մլրդ դրամով:

Ընթացիկ ծախսերից 68.3 մլրդ դրամ տրամադրվել է պետական հիմնարկների աշխատողների աշխատանքի վարձատրությանը, որը կազմել է տարեկան ծրագրի 84%-ը և 0.9%-ով գերազանցել նախորդ տարվա հունվար-նոյեմբեր ամիսների ցուցանիշը: 4.7 մլրդ դրամ տրամադրվել է պարտադիր սոցիալական ապահովության վճարներին՝ 80.2%-ով ապահովելով տարեկան ծրագրի կատարումը և 4%-ով զիջելով նախորդ տարվա ցուցանիշը:

Ծառայությունների և ապրանքների ձեռքբերման նպատակով պետական բյուջեից օգտագործվել է 175.4 մլրդ դրամ, որը կազմել է տարեկան ծրագրի 84.4%-ը և 19.2%-ով գերազանցել նախորդ տարվա համապատասխան ցուցանիշը՝ հիմնականում պայմանավորված նյութերի ձեռքբերման ծախսերի աճով:

Հաշվետու ժամանակահատվածում 35.3 մլրդ դրամ տրամադրվել է պետական պարտքի սպասարկմանը՝ կազմելով տարեկան ծրագրի 80.9%-ը: Մասնավորապես՝ նշված

գումարից 23.2 մլրդ դրամը տրամադրվել է ներքին, 12.1 մլրդ դրամը՝ արտաքին պարտքի սպասարկմանը: Պետական պարտքի սպասարկման ծախսերը 13.6%-ով գերազանցել են նախորդ տարվա նույն ցուցանիշը՝ պայմանավորված և՛ ներքին, և՛ արտաքին պետական պարտքի սպասարկման ծախսերի աճով:

Հաշվետու ժամանակահատվածում ՀՀ պետական բյուջեից տրամադրվել են 19.1 մլրդ դրամի սուբսիդիաներ՝ կազմելով տարեկան ծրագրի 90.5%-ը և 14.6%-ով գերազանցելով նախորդ տարվա ցուցանիշը:

Շուրջ 99.2 մլրդ դրամ են կազմել պետական բյուջեից տրամադրված դրամաշնորհները, որից 97.7 մլրդ դրամը տրամադրվել է պետական հատվածի այլ մակարդակներին, 1.5 մլրդ դրամը՝ միջազգային կազմակերպություններին: Մասնավորապես՝ համայնքների բյուջեներին տրամադրվել են 29.7 մլրդ դրամի դոտացիաներ, որոնք նախորդ տարվա նույն ժամանակահատվածի համեմատ գրեթե չեն փոփոխվել: Դրամաշնորհների տարեկան ծրագիրն ընդհանուր առմամբ կատարվել է 91%-ով, իսկ նախորդ տարվա հունվար-նոյեմբեր ամիսների համեմատ նշված ծախսերն աճել են 14.1%-ով:

Ընթացիկ ծախսերի 34.3%-ը՝ 261.6 մլրդ դրամ, ուղղվել է սոցիալական նպաստների և կենսաթոշակների վճարմանը՝ ապահովելով ներկայացված բոլոր պարտավորությունների կատարումը և արձանագրելով տարեկան ծրագրի 89.2% կատարողական: Մասնավորապես՝ 180.8 մլրդ դրամ են կազմել կենսաթոշակները, 71.7 մլրդ դրամ՝ նպաստները: 9.1 մլրդ դրամ տրամադրվել է սոցիալական ապահովության միջոցառումների իրականացման նպատակով աշխատողներին առաջարկվող սոցիալական փաթեթի ծառայությունների շրջանակներում, որից 7.4 մլրդ դրամն օգտագործվել է բժշկական ապահովագրության նպատակով: Նախորդ տարվա նույն ժամանակահատվածի համեմատ նպաստների և կենսաթոշակների ծախսերն ավելացել են 12.4%-ով կամ 28.9 մլրդ դրամով:

Հաշվետու ժամանակահատվածում պետական բյուջեի միջոցներից 100.1 մլրդ դրամ տրամադրվել է այլ ծախսերին՝ կազմելով տարեկան ծրագրի 83.4%-ը և 15.9%-ով զիջելով նախորդ տարվա նույն ցուցանիշը:

Պետական բյուջեի ոչ ֆինանսական ակտիվների հետ գործառնությունները հունվար-նոյեմբեր ամիսներին կազմել են 67.9 մլրդ դրամ կամ տարեկան ծրագրի 71.6%-ը: Մասնավորապես՝ 70.5 մլրդ դրամ են կազմել ոչ ֆինանսական ակտիվների գծով ծախսերը, որոնց տարեկան ծրագիրը կատարվել է 73%-ով: Շուրջ 2.6 մլրդ դրամ է մուտքագրվել ոչ

Ֆինանսական ակտիվների օտարումից՝ 44.2%-ով գերազանցելով տարեկան ծրագիրը: Նախորդ տարվա նույն ժամանակահատվածի համեմատ ոչ ֆինանսական ակտիվների հետ գործառնությունների ցուցանիշը նվազել է 25.1%-ով՝ պայմանավորված շենքերի և շինությունների վրա կատարված ծախսերի նվազմամբ և ոչ ֆինանսական ակտիվների օտարումից մուտքերի աճով:

ՀՀ պետական բյուջեի հավելուրդը

2012 թվականի հունվար-նոյեմբեր ամիսների ընթացքում ՀՀ պետական բյուջեն (առանց արտաքին աղբյուրներից ֆինանսավորվող նպատակային ծրագրերի շրջանակներում ստացված վարկային միջոցների) կատարվել է 9.4 մլրդ դրամ հավելուրդով՝ տարեկան ծրագրով նախատեսված շուրջ 44.6 մլրդ դրամ և նախորդ տարվա նույն ժամանակահատվածի 38.1 մլրդ դրամ պակասուրդի դիմաց:

Պետական բյուջեի հավելուրդի ներքին աղբյուրները կազմել են -18.3 մլրդ դրամ, արտաքին աղբյուրները՝ շուրջ 8.9 մլրդ դրամ: Ներքին աղբյուրներում 23.0 մլրդ դրամ են կազմել փոխառու զուտ միջոցները, -41.3 մլրդ դրամ՝ ֆինանսական զուտ ակտիվները: Պետական բյուջեի եկամուտների, ծախսերի և պակասուրդի ֆինանսավորման աղբյուրների տարեկան ծրագրից շեղումների արդյունքում ֆինանսավորման ներքին աղբյուրներում բյուջեի ազատ միջոցներից տարեկան ծրագրով նախատեսված 23.6 մլրդ դրամ օգտագործման դիմաց հունվար-նոյեմբեր ամիսներին նշված միջոցներն ավելացել են 27.5 մլրդ դրամով: 24.8 մլրդ դրամ են կազմել գանձապետական պարտատոմսերից զուտ մուտքերը՝ ապահովելով տարեկան ծրագրված ծավալի 82.1%-ը: Մուրհակների մարման նպատակով օգտագործվել է 308.0 մլն դրամ կամ տարեկան ծրագրի 98.4%-ը: 1.5 մլրդ դրամ ուղղվել է «ՎՏԲ-Հայաստան» ՓԲԸ-ից ստացված վարկի մարմանը՝ ամբողջովին ապահովելով տարեկան նախատեսված ծավալը: Հաշվետու ժամանակահատվածում 496 մլն դրամ է տրամադրվել բաժնետոմսերում և կապիտալում այլ մասնակցության ձեռքբերման նպատակով, որը կատարվել է տարեկան նախատեսված ծավալով: Հաշվետու ժամանակահատվածում ՀՀ ռեզիդենտներին պետական բյուջեից տրամադրվել են շուրջ 20.4 մլրդ դրամի վարկեր կամ տարեկան ծրագրով նախատեսված ծավալի 84.5%-ը: Շուրջ 7.2 մլրդ դրամ ստացվել է տրամադրված ներքին վարկերի վերադարձից, որը կազմել է տարեկան ծրագրով նախատեսված ցուցանիշի 50.3%-ը:

Անցած ժամանակահատվածում պետական բյուջեի պակասուրդի արտաքին ֆինանսավորումը կազմել է 8.9 մլրդ դրամ, այդ թվում՝ 43.1 մլրդ դրամը՝ փոխառու զուտ միջոցների, -34.2 մլրդ դրամը՝ ֆինանսական զուտ ակտիվների գծով: Արտաքին աղբյուրներից տրամադրվել են 60.2 մլրդ դրամի վարկային միջոցներ՝ կազմելով տարեկան ծրագրի 90.6%-ը: Մասնավորապես՝ Եվրամիության կողմից Մակրոֆինանսական աջակցության ծրագրի շրջանակներում հաշվետու ժամանակահատվածում տրամադրվել է 20.2 մլրդ դրամ, Համաշխարհային բանկի հետ Զարգացման քաղաքականության երրորդ ծրագրի շուրջ գործող համաձայնագրի շրջանակներում՝ 30.3 մլրդ դրամ, Արժույթի միջազգային հիմնադրամի կողմից՝ 9.8 մլրդ դրամ: Ավելի քան 17.1 մլրդ դրամ (տարեկան ծրագրվածի 62.4%-ը) ուղղվել է արտաքին պարտավորությունների մարմանը, որից 5.7 մլրդ դրամ հատկացվել է Համաշխարհային բանկի աջակցությամբ իրականացվող ծրագրերի գծով պարտքի մարմանը, 429.1 մլն դրամ՝ ԳԶՄՀ, 278.2 մլն դրամ՝ ՎԶԵԲ, 379.0 մլն դրամ՝ ՕՊԵԿ-ի միջազգային զարգացման հիմնադրամի, շուրջ 8.0 մլրդ դրամը՝ Արժույթի միջազգային հիմնադրամի, 126.3 մլն դրամը՝ Աբու-Դաբիի Զարգացման Հիմնադրամի նկատմամբ ունեցած պարտքի մարմանը, 654.7 մլն դրամ՝ ԱՄՆ ապրանքային վարկերի մարմանը, 1.2 մլրդ դրամ է տրամադրվել Էլեկտրաէներգիայի հաղորդման և բաշխման համակարգի ծրագրի գծով Ճապոնիայի նկատմամբ պարտքի մարմանը, 55.6 մլն դրամ՝ ԱԷԿ-ի վառելիքի չոր պահպանման համակարգի ծրագրի գծով Ֆրանսիայի նկատմամբ պարտքի մարմանը, 346.7 մլն դրամ՝ Գերմանիայի Դաշնային Հանրապետության նկատմամբ պարտավորությունների մարմանը:

Հաշվետու ժամանակահատվածում 33.5 մլրդ դրամ միջպետական վարկ է տրամադրվել ԼՂՀ-ին՝ ապահովելով տարեկան ծրագրի 93.3%-ը: Վրաստանի կողմից Հայաստանի նկատմամբ ունեցած վարկային պարտավորությունների գծով կատարվել է 229 մլն դրամի վճարում՝ կազմելով տարեկան ծրագրի 76.6%-ը: Բաժնետոմսերի և կապիտալում այլ մասնակցության ձեռքբերմանն ուղղվել է 906.3 մլն դրամ՝ կազմելով տարեկան ծրագրի 99.1%-ը: Հաշվետու ժամանակահատվածում արտաքին աղբյուրներից ստացված արտաբյուջետային դրամաշնորհային միջոցների մնացորդից օգտագործվել է 32.9 մլն դրամ: